

29. oktober

UKA2018/47

**Nappaatit suut napparsimasut sivikitsumik piffissamiluunniit aalajangersimasumik sivisussusiligaanngitsumi Danmarkiliarlutik katsorsartikkiartortariaqalertanerannik kinguneqartarnersut pillugit Naalakkersuisut UPA2019-mi nassuiaammik saqqummiussinissaat pillugu Inatsisartunut aalajangiiffigisassatut siunnersuut. Nassuiaammi aningaasatigut nakorsaanikkullu periarfissat suut ungasinnerusoq isigalugu napparsimasunik Danmarkimut katsorsartikkiartortunik ikilisisisinnaasut ilanngunneqassapput.**  
Inatsisartunut ilaasortaq Aqqaluaq B. Egede, Inuit Ataqatigiit)

Qulequtaq taaneqartoq pillugu Siumumiit imatut oqaseqassaagut.  
Siumup pingaartitarivaa suliniutiguassallugulu innuttaasut peqqissutsikkut inooqatigiinnikkullu pitsaanerpaamik sullinneqarnissaat atugaqarnissaallu.  
Innuttaasut tamatta peqqinnartumik inuuneqarnissarput nammineq akisussaaffigarput.  
Innuttaasut tamatta pisussaaffeqarpugut inoqatitta peqqinnartumik inuunissaannut aqutissiusseqataassalluta.

Siumumiit ilisimaarivarput kalaallit nunatsinni nappaatit assigiinngitsut nunatsinni katsorsarneqarsinnaanngitsut qallunaat nunaannuukkajunnerusoq ingerlanneqartarnerani. Tamannalu pisarpoq maani nunatsinni nakorsatigut suli uagut nammineq naammattunik peqanngitsinnik.  
Taamatut periuseqarneq nunatsinni napparsimasortatta uagut nammineq nunatsinni katsorsarneqarsinnaanngitsortatta danskit napparsimaveqarfianniit sullinneqartarnerat siumumiit qujamasuutigaarput.  
Illumoorpoq nunatsinni peqqinnissaqarfimmi innuttaasunut sullissinermik atugassarititaasut sapinngisamik pitsaanerpaanissaat tamatta politikkeriusugut anguniartuartariaqarparput. Siumumiillu tamanna peqataaffigalugu inerisaaqataaffigiuassallugu piareersimaffigijuarpuput.

Siumumiit ilisimaarivarput nappaatit assigiinngitsut nutaat nunatsinni takkuttarmata. Ajoraluartumillu aamma nappaatit ilaqartarput nakorsarneqarnissaminnik suli qullersaniit nassaarfigineqarsimanngitsunik. Tamakkulu aamma naalakkersusunut kaammattuutigissavarput sapinngisamik sullinneqarsinnaanissaannik pitsaanerpaamik periusissamik ujartunissaannik. Kiisalu aamma atortuutit pitsaasutut nunatsinni atorineqareersut soorlu "Pipaluk" nakorsaqarfeqanngitsuni avinngasinnerusuniittuni atorluarneqarsinnaanissaannik ujartueqqullugit.

Siunnersuuteqartup siunnersuutaa paasillugu ilalerparput taamatut nassuiaammik naalakkersuisut suliaqarnissaannik, takussutissaqarnissaq nunatsinni pingaartikkatsigu. Siumumiillu isumaqarpugut suliaasaq peqqissaarullugu ingerlanneqartariaqartoq taamaammat naalakkersuisut siunnersuutaat ilalerlugu oqaatigissuarput.

Oqallilluarisilu  
Mala Høyt Kuko, Siumut